

Collavuraziun verifichada

Il Center da sandà Engiadina Bassa das-cha verer inavo sün ün bun on da gestiun. La basa es solida ed eir in avegnir gnarà adattada la gestiun regularmaing a las pretaisas actualas.

Daspö l'on 2007 collavuran in Engiadina Bassa sportas dal provedimaint da sandà, da la chüra, da la chüra d'attempats e dal bainesser suot il tet dal Center da sandà Engiadina Bassa (CSEB). La via cumünai vla d'eira ed es amo adüna innovativa. L'organisasiun sgüra il provedimaint da sandà e d'urgenza, la chüra staziunara ed ambulanta e la sporta dal Bogn Engiadina.

Garantir il provedimaint da sandà

Cun passa 300 collavuraturas e collavuraturas es l'interpreta da grond'importanza economica per la regiun. «Graz-cha al svilup dal CSEB po gnir garanti il provedimaint da sandà in nossa regiun periferica e quai cun üna sporta vasta e dad ota qualità», manzunan ils respunsabels dal CSEB i'l rapport annual. Eir in avegnir esa previs da sviluppar inavant las sportas. Quai in maniera consequenta ed in resguardond ils bsögns da la populaziun ed in prestond üna contribuziun «essenziala per ün'ota qualità da provedimaint e da vita per indigens e per giasts». Suot il tet da la holding dal CSEB sun units tanter oter ils servezzans da l'ospital, servezzans da salvamaint, la Spitex e differentas gruppas da chüra. «Uschè pon gnir coordinadas las sportas da quists servezzans optimalmaing, quai a favur da la populaziun, da las paziaintas e dals paziaints, dals cliaints, da las abitantas e'ls abitants e dals giasts», es l'avis dals respunsabels dal CSEB.

Augmantà il numer dals paziaints

L'on 2018 d'eira impustüt economicamaing ün on da success. Il quint annual es in congal cul preventiv ün

milliun francs plü ot co previs. In congal cul quint da l'on avant resulta ün augmaint da 444000 francs, quai adonta da l'ingrondimaint da la sporta e pretaisas plü otas. «Allegraivel es il resultat pro la gestiun da l'ospital», declera Joachim Koppenberg, il directer dal CSEB. «Qua haja dat ün augmaint dal numer dals paziaints da 18 pertschient congalà cun l'on avant». Il numer dals paziaints staziunaris s'ha augmantà l'on 2018 per 219 persunas ad ün total da 1423 persunas. Quist fat ha procurà per la part da l'ospital per ün guadogn da 21000 francs. Plünavant ha quai pussibilità da far reservas per finanziair plü tard investiziuns da rimplazzamaint. «Eir ils resultats dals quint annuals da las differentas gestiuns da chüra sun allegraivels», uschè il directer dal CSEB.

Glüm verda per l'integrasiun

Eir cun la realisaziun da divers progets da qualità s'haja gnü success l'on passa. Uschè ha gnü lö la renovaziun da la tschertificaziun tras la «sanaCERT» e quai cun ün güdicat da 39 da 40 puncts pussibels. Sper la sporta da basa e'l servezzans dals cas urgiants esa stat pussibel d'augmentar la sporta dals meidis specialisats. «Cun quai vana pudü guadagnar ils indigens per operaziuns planisadas», manzuna Joachim Koppenberg. Quai ha gnü l'effet cha l'ospital ha pudü augmentar l'occupaziun da la capacità dals lets d'urgenza l'on 2018 ed impustüt d'urgenza dals lets da settember, october e november. «Quist fat allegraivel ha gnü per consequenza üna chargia supplementara per nos persunal.» Actualmaing sun ils respunsabels l'andervia a preparar l'integrasiun da la Dmura d'attempats Engiadina Bassa a Scuol illa gestiun dal CSEB. Davo cha la radunanza generala dal Consorzi Chasa Puntota vaiva approvà la dumonda correspondentia ha d'incuort eir il cussagl da fundaziun dal CSEB dat glüm verda per far il pass per la fusiun, prevista pel cumanzamaint da l'on 2020. (anr/afi)